



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma :

Tir Yimyim

tiryimyim@aolima

tir yimyim

TAPAK 8

China-i linük nung ki o jen yanglutsüsü: Sri Lanka PM

Miami Open: Alcaraz, Medvedev, Sinner quarter-i iogo

VOL. XXI ISSUE NO. 165 (ADOK 165) DIMAPUR YANGTEPNÜ (THURSDAY) METSÜREMI (MARCH) 28, 2024 ₹ 5.00

Tanü Eastern Nagaland ajunga mokdang

Dimapur, March 27, 2024 (TYO): March 28 Brihostibarnü Tuensang headquarters nung Eastern Nagaland public senden amentsü aliba atema Eastern Nagaland People's Organisation (ENPO)-i ghonda 12 mokdangtsü ayongzükogo.

Brihostibarnep 6:00 ako nungi Eastern Nagaland ajungalen mokdangtsü ta ENPO-i ashi.

Ajisüaka, iba mokdang kübok district administration, police, paramilitary forces, power department, public health engineering department, fire & emergency services, medical emergencies, media aser sendeni arurtem madentsü ta ENPO-i metetdaksüogo.

Centre sorkari 2024 Lok


Sabha elections matongdang Frontier Nagaland Territory (FNT) metentetba atema iba senden ayonga amentsü.

Asüng amentsüba senden nung Eastern Nagaland nungi MLA 20, kin hohotem aser sendaktepa alirtem adentsü.

March 5, 2024 nü ENPO den tanga kin hohotemi Eastern Nagaland ajungalen "Public Emergency" ayongzuka liasü. Centre-i Frontier Nagaland Territory (FNT) tetettsü menuba atema parnoki iba lungkak aitba sentong tenzük.

March 19 nü senden ka amendang ENPO-isa February 23 bangzüng akangshitepa liasü aser ibaji central aser state elections kecha nunga shilem magitsüba lir.

Nagaland Forest Management Project Society osang metetpela



Nagaland Chief Secretary J. Alam, IAS-i Nagaland Forest Management Project Society indang Annual Report sayatsüdang agiba noksa angur.

Kohima, March 27, 2024 (DIPR): Nagaland Forest Management Project Society nung High-Power Committee senden ka Bodbarnü Chief Secretary Conference Room nung menogo.

High-Power Committee nung Chairperson ji Nagaland Chief Secretary J. Alam, IAS lir aser lenisüba kübok senden nung mapatong inyaka meyipa reprangshimsü aser financial year 2024-25 atema mapatem agizüksü atema liasü.

Senden nung State sorkar tenüng nung Finance Department, Agriculture Production Commissioner, PHED, Director, Employment, Skill Development and Entrepreneurship aser

Environment, Forest & Climate Change ketdangsurtem aden.

Chief Project Director, Dharmendra Prakash lenisüba kübok Project Management Unit, NFMP ajanga mapatong sayu.

Parnoki PowerPoint presentation ka ajanga osang lemsatepdang Nagaland Forest Management Project Society tenzüker küm 7 buba lir aser tang tashi nung yimtsüng 144 nung 35,082 Hectares ayimjema inyakba metetdaksü.

Mapatong indang alizüngji yimtsüng 185 nung ali 79,000 hectares lir.

Self Help Groups 410-i senotsü teyari nguogo aser loan indang 1st cycle 100% meyipa agütsüogo.

Iba mapatong nung 78 lakh

seedlings tashi temogo aser nisung anogo lakh 18 shi mapa agütsüogo. Taruba financial year nung iba mapatong nung yimtsüng 41 kübok 9129 hectares nung mapa inyaksü ta PowerPoint presentation nungsa sayua liasü.

Chief Secretary Alam-i MIS program asoshi tenüngsang agütsü aser iba mapa ya tanga department temia inyaksü akok ta ashi.

Forest Department-i iba mapatong takok ngua inyakba atema tenüngsang agütsür ta paisa ashi.

Iba sentong nung Annual Report saya aser Chief Project Director-i the Chairman HPC aser züngsem ajak dang pelaba metetdaksü.

India-i Myanmar den arrtsü atsüdangba nung Rs 370 crore endoktsü

Guwahati, March 27, 2024 (Agencies): India sorkari taruba küm 10 tsüngda Myanmar den arrtsü atsüdangtsü asoshi Rs 370 crore shi lemküksüogo ta Reuters report ka ajanga ashi.

Myanmar den kilometre 1610 (1000-mile) arrtsü atsüdangtsüba ya ozüng alema shibelenba aser tanga inyakyimtem noktangtsü atema lir.

Taküm küm tetenzüklen India sorkari Myanmar arrtsü atsüdangtsü aser visa-free movement agreement agientsüba osang metetdakja liasü.

India sorkari national security aser Northeast region wazüka ayutsü tangatetba nung iba lemtet agia liasü.

Tang tashi nung Myanmar nungi arrtsü atsüdangtsüba dak sendakba olen kecha mali.

2021 küm Myanmar nung Army-i sorkar atsüngdokba sülen civilians aser sepaitem aika India kübok state balala nung jenoka lir.

Myanmar nung arrtsü adena aruba ya Centre sorkari teblemtsü

abener aser India litsü nunga kin o kin tsüngda mangatetpet adoktsü ama bilemer.

Külen, sorkar ketdangsur kari Manipur nung tensa tamajungba akümba ya Myanmar den arrtsü ajanga maparen inyaksangshiba ajanga lir ta shiogo.

Manipur nung küm ka shi kin ana tsüngda mangatetpet adoker rarayonga arur aser kin kabo Myanmar nung Chin kin den sendaktepa lir.

India nung tongti ketdangsurtem adenba luden kati arrtsü nung atsü den külemi gari lenmangtem yanglutsü aser arrtsülen sepaitem amenoka alidak den feeder roads 1700 km (1050 miles) agi sendakteptsü sentong renemogo.

Myanmar den arrtsü aser gari lenmang kilometre ka nung Rs 125 million rupees endoktsü ta Reuters report nungsa shia lir.

Iba ya 2020 nung Bangladesh den arrtsü atsüdangdang kilometre shia 55 million rupees endokba den teimba lir.

Manipur Governor-i Mar 30-31 mapa inyaksü tuyur

Ukhrul, March 27, 2024 (Agencies): Manipur nung sorkar office tem nung maparen tiptema inyaksü atema Governor Anusuiya Uikey-i March 30 (Honibar) aser March 31 (Deobar) mapa inyakba anogotem ta sangdongogo.

Iba tetuyuba ya Manipur sorkar kübok Public Sector Undertakings/Corporations/Autonomous Bodies/Societies

dena Government Offices ajak atema lir ta Governor Uikey-i ashi.

Governor's Secretariat nung Deputy Secretary (GAD) ajanga sangdong agütsüba ya Financial Year 2023-24 tembangba anogotem nung maparen tiptema inyaksü atema lir ta shia lir.

Iba tetuyuba ajanga Manipur nungbo Easter Sunday nunga sodi mali office ajak lapoktsü.

2032 tashi nungbo Congress nung Hindu aser Muslim nunger malitsü

Guwahati, March 27, 2024 (Agencies): 2032 tashi nung Congress nung Hindu nunger ka danga malitsü aser 2032 tashi nung Muslim nungera malitsü ta Assam CM Himanta Biswa Sarma-i metetdaksüogo.

BJP renloka aoba ajanga Congress samatsü aser talisa Narendra Modi maneni Prime Minister shim nungbo Congress mali akümtsü ta CM Sarma-i ashi.

Assam nung Lok Sabha election atema nomination maparen tenzükgogo aser yashi

Sarbananda Sonowal-i Dibrugarh LS menden atema nomination agütsüdang CM Sarma-ipa meina ao.

Congress party toktsür nisungtemi tanga teloktem nung adener. Congress züngsem aika BJP nung denogo, ta CM Sarma-i osangbener den jembidang ashi.

"Congress züngsem aikati BJP nung adener aser Rajiv Bhawan nung taktang tazüng aika akümtsü saka takdang nung candidate tamener malitsü. Assam nung iba tensaji ataloker" ta paisa ashi.

"Narendra Modi-i maneni Prime minister inyaksü tenzügba sülen iba ya tuluba küma aotsü. 2032 tashi nung nung Congress mali akümtsü" ta CM Sarma-i ashi.

Assam nung shilem asem lemsar April 19, 26 aser May 7 anogotem Lok Sabha elections agitsü.

Assam nung Lok Sabha constituency 14 lir aser tongtipang mendentemji Dibrugarh, Jorhat, Kaziranga, Guwahati, Dhubri, Sonitpur, Nagaon, Barpeta aser Silchar lir.

Naga nunger ka tepsettsü merangba aitsür: NIPF

Dimapur, Metsüremi/March 27 (TYO): Niuland district kübok Zukihe yimdak March 9, 2024 nü Naveen Kumar Singh aser Papu Dharam Singh nati Yetovi Zhimomi tepsettsü merangba aser Dimapur district kübok Pimla yimdak Amir Hussain aser Azarad Ali nati March 18, 2024 nü Kumughato tepsettsü merangba khukhua aitsür, ta Nagaland Indigenous People's Forum (NIPF) ajanga sangdong ka nung ashi.

Non-local temi iba ama tatok magütsütetba mapa tamajung asen Naga nunger dak inyakba tang mezüng masü. Nagaland ya Tripura ama ka makumdang asenoki mera agitsü mapang tongogo, ta NIPF ajanga ashi.

Anungji ozüng amshirtem-i aibelener nem pei tai yari ozüng agi mela aliba ama temerenshi agütsüsüla aser shingaia parnok bail nung magizüksüla, ta NIPF ajanga ashi.

Nagaland nung iba ama mapa tamajung meinyakdaksütsüla, kechiaser asenok lisopur lendong nung lir aser item ama azü mesepba mesen tamajung asen lima nung lidakja asen dak tashiyim amshia mapa tamajung inyaker, ta ashi.

Nagaland sorkari Nagaland tesem ajunga nung inner-line permit (ILP) shidak mapa kuma inyaksüla aser tai maket lisopur temeden kumzuka aser wazüka ayutsüla, ta NIPF ajangasa ashi.

DIMAPUR AO BAPTIST AROGO

HEALING MINISTRY TANEPTSÜ SENTONG

DABA Main Church nung April 3, 2024 anepdang 7:00 AM nungi sentong tenzüksü. Tamang agi nisung ajak arua adentsü pelashishia jaoker. Tsüngrem asoshi kecha tamakoktsü mali. Yisui la dang ashi "Tenü, ne tamang agi na junga kümogo... junga liang." Mark 5:34

Sd/-

Pastor, DABA

Dimapur nung Presiding Officers & First Polling Officers training agi



Lok Sabha elections atema Dimapur Government College, Dimapur nung March 27, 2024 nü 1st Phase training agütsüdang ADC & ARO Dimapur-I, Mhalo Humtsoe-i jembiba noksa nung angur.

Dimapur, Metsüremi/March 27 (TYO): District Commissioner's Office & District Election Officer, Dimapur ajanga aruya aliba Lok Sabha elections atema terenemshiba ka ama Presiding Officers aser First Polling Officers tem asoshi phase mezüingbuba training ayongzüka agiogo.

Training ya March 27, 2024 nü Dimapur Government College, Dimapur nung agia liasü, kong Dimapur, Chümoukedima aser Niuland nungi ketdangsurtem dena liasü.

DC & DEO Dimapur, Dr. Tinjongshi Chang-i ashiba agi, tongtipang onüktem nem training agütsüba ajanga election ketdangsurtemi mera balala agia Presiding Officers aser First Polling Officers nem nungdakba skills aser shisatsü agütsür aser itemji amshia polling station tem tajungtiba nung ketdang asütsü aser Lok Sabha election 2024 mapang election maparen ochishia inyaktetsü.

Kidang kibong anepalutsü liaka tetsür ketdangsur temi meranga inyakba ngua pai

pelaba lemsatop. Mhalo Humtsoe, ADC & ARO Dimapur-I ajanga iba training nung jembidang Presiding Officers aser First Polling Officers temi democratic inyakyim nung shilem tajung agiba atema pelaba lemsatopa liasü.

Dimapur, Niuland aser Chümoukedima nungi ketdangsurtemi lungjemer meranga inyaksü nungdaker, aser nungdakba mapang master trainers nungi teyari meshitsüla, aji asünung dang pei nem nungloktsüba maparen takok ngua inyaktetsü, ta Humtsoe-i ashi.

District Level Master Trainers ajanga election maparen nung Presiding Officers aser First Polling Officers shilem rateta ashi aser polling stations ketdangsütsü, election timi agitetsü aser vote agütsüba yimya junga achayangtsü indang lemsatopa liasü.

Iba training nung Electronic Voting Machines (EVMs) amenokba aser election mapang item machine mapa shidak inyaksü asoshi

connections shidak agütsü, EVMs mapa shidak inyaker asü masü ta jangjatsü atema Mock Poll agütsüba, election maparen ochishia inyaksü asoshi EVMs aser Voter Verifiable Paper Audit Trail (VVPAT) shibangba, election tenzüka nungi tatem tashi inyaksü maparen, vote agütsüba mapang EVMs amshiyim indang onüktem nung ajemdaker training agüja liasü.

Iba training nung District Level Master Trainers ya T. Zanthungo Nguilie, LhipeNaro, Dr. Yelhi Vero, Nunsangtola Walling, Mordecrai Chase, N. Mongjung Phom, Ngutoli Y Swu, E. Lichumthung Kikon, Nukshisangla Lemtur, Zasekhoyi, I. Asangla Aier, I m k o n g n u n g s a n g , Limawapang Ao, Kekhriekho-ü, James Sema, Vedi, Haineslo, Imna, Kelevino, Bodevi, Aroko, Chubalemla, Imli, Sentitsüngla, Kedisakho, Dr. Pete aser Wati nungertem liasü.

Iba training nung Presiding Officers aser First Polling Officers tetsür 256 aser tebur 940 arua shilem agia liasü.

Tuensang nung Sector Officers aser Sector Commanders senden amen

Dimapur, Metsüremi/March 27 (TYO): Lok Sabha asoshi aruya aliba General Election 2024 mechi Sector Officers aser Sector Commanders tem den senden ka March 27, 2024 nü Deputy Commissioner, Tuensang indang Conference Hall nung

menas liasü. Iba senden nung Deputy Commissioner and District Election Officer, Tuensang, A. Zibenthung Kithan (NCS) ajanga Sector Officers aser Sector Commanders indang mapa aser teinyaksütem lemsatopa liasü.

Paisa parnok dang kati ka den osangtsüsang agitema amalitep akatsü metetdaksü. Maneni parnok dang pei polling stations semdangtsü ajungshia liasü.

Iba sentong nung SP Tuensang, Kanchan Kumar Kandpal, IAS-ia jembiba liasü.



Lok Sabha atema General Elections 2024 asoshi Master Trainers temi Mayangnokcha GHSS, Mokokchung nung March 27, 2024 nü polling personnel tem nem training agütsüdang tangokba noksa nung angur.

Mokokchung nung Medical Board for Exemption alitsü

Dimapur, Metsüremi/March 27 (TYO): Deputy Commissioner aser District Election Officer, Mokokchung, Thsuvisie Pho-ji-i sangdong ka ajanga ashiba agi, election duty atema polling personnel aser Grade IV staff/MTS requisition süa alirtem exemption atema Medical Board April 1, 2024 anepdang 10:00 ako nungi tenzüka Office of the District Planning Officer, Mokokchung indang Planning Hall nung amentsü.

Iba dak sendakba nung medical ground (Annexure-A) nung ajemdaker leave meshia alirtem aser kasa kuli nung

leave agütsü bilema alirtem nungdangba documents/certificate tem bener shia aliba anogo medical board dangi tsüngtong arutsü metetdaksür, ta sangdong ajanga ashi.

Medical Board khen dang amentsü, anungji iba sülen medical board dangi leave bener aruba magizüksü, ta DC & DEO Mokokchung ajanga ashi.

Mashisa aliba tetsürtem aser mama teyongdak aliba tetsü tem shirnoki document dener leave atema application agütsüogo, parnok Medical Board dangi arutsü menüngdak, ta sangdong ajangasa ashi.

DC Peren office khen atema ADC Office nung belenoka lir

Dimapur, Metsüremi/March 27 (TYO): Deputy Commissioner & District Election Officer, Peren, Vineet Kumar IAS ajanga sangdong ka nung ashiba agi, Lok Sabha election 2024 tajungtiba nung agitetsü mechi Peren Headquarters nung

aliba Deputy Commissioner office khen atema ADC Office Peren Town nung belenoka lir.

DC office ya Peren headquarter-i April 22, 2024 nü nungi tanaben belener aotsü, ta Deputy Commissioner, Peren ajangasa ashi.

Ladies Unit, Naga Army küm 25 jungogo



Dimapur, Metsüremi/March 27 (TYO): Ladies Unit, Naga Army 25 buba Raising Day nungtem nung sentong ka "Sisters in Arms: Unveiling the Legacy" omen nung ajemdaker March 26, 2024 nü Ladies Unit Compound, General Headquarters, Naga Army nung agia liasü.

Iba sentong nung Kedallo Tongmeth Wangnao tongti tesemdang liasü. Pai lokti den jembidang tetsür temi linük tenzüka wadang nung dangar dak alakteta inyakba asoshi tenüngsang agüja liasü.

Commanding Officer, Ladies Unit, Naga Army Lieut.

Col. Leishimi Muinao, MSM ajanga tarur pela agizükba o jembidang, "Tanü Ladies Unit alizüing tongteta Silver Jubilee amungba mapang asenoki takok anguba, tayongzüka balala ajangetta aser bendanga agütsüba bilemtetsüla," ta ashi.

Mezüngpur aser seniors temi bendanga agütsüba ajanga asenoki tanü iba jenjang tongteta asenok benjonger, ta lai ashi.

Naga Army indang Ladies Unit temi mezüngpur nem tenüngsang agüja liasü. Naga Army indang Ladies Unit ya 1999 küm tenzüka liasü.

Mon nung disaster management training agütsü

Dimapur, Metsüremi/March 27 (TYO): Department of Home Guards & Civil Defence ajanga State Disaster Response Force, Mon den lungjemer Government Higher Secondary School, Mon nung azünger kaketshir aser staff tem atema disaster management training ka

March 27, 2024 nü agüja liasü.

Iba training nung Lipoksashi Aier-i anir Home Guards & Civil Defence aser State Disaster Response Force nungi personnel temi CPR, bandaging aser emergency method of rescuing yimyatem sayua liasü.

Dimapur nung mejangjaba tasü mang ka nguteta lir

Dimapur, Metsüremi/March 27 (TYO): Dimapur nung aliba nüburtem dangi East Police Station, Dimapur dangi March 27, 2024 anepdang 8:20 ako meta telephone ajanga arishi küm 70 shi tain non-local tebur tasü mang ka Dimapur Gun House, Dimapur tejakdang Eros Lane foot path nung lir ta osang aru.

mongutet, ta Commissioner of Police, Dimapur ajanga sangdong ka nung ashi.

Ozüng agi mela aliba maparen ajak tembangba sülen tasü mang ya post-mortem examination/jangjatsü asoshi District Hospital Dimapur morgue nung bener oa lir.

Osang aruba sülen East PS duty party tem iba tasü mang aliba tesem bushia ao aser tasü mang meita aoba mapang iba nisungba dak tim masüba mapa inyakba

Kibur/kinunger/medemer temi Officer-in-Charge, East Police Station, Dimapur den Mobile No. 7085055020 ajanga tongteprateptsü akok, ta sangdong ajangasa ashi.



March 27, 2024 nü Nagpur nung Union Minister aser BJP candidate, Nitin Gadkari-i Lok Sabha election atema nomination file asüi aodang tangokba noksa nung angur. Kasa noksa nung Maharashtra Deputy Chief Minister Devendra Fadnavis aser tangartema angur.

Jammu & Kashmir nung party temi AFSPA ozüing agiendaktsüner

Srinagar, March 27 (Agencies): Union Home Minister Amit Shah-i Jammu & Kashmir nung AFSPA agientsü atema jembibaji J&K nung yimtenren party temi pelaa agizüker, ta metetdaksü.

Ajisüaka Union Territory nung assembly elections menoa magiba atema parnoki jashiba lemsatep.

National Conference tatong Tir, Omar Abdullah-i BJP-i Jammu & Kashmir nung election menoa magiba atema aitsü.

Paisa o agi nangzükba amaji mapa agia inyaktüsü, ta ashi.

Omar Abdullah-i, "2011 küm nungi ni iba anogo ataa liasü. Ajisüaka parnoki (BJP) sixth schedule dak sendakba nung

Ladakh nung alirtem dang yazü jembii; iba denji kasa BJP-i Jammu and Kashmir nung election magidang Armed Forces (Special Powers) Act (AFSPA) agientsü dak sendakba nung tiyazü nangzükür," ta metetdaksü.

Union Home Minister Amit Shah-i, Centre sorkari Jammu & Kashmir nung AFSPA agientsü atema jembidar, ta sangdongba dak sendakba nung taoba mapang Jammu & Kashmir chief minister aser People's Democratic Party tongti, Mehbooba Mufti-i, onoki chichiba temelenshi adoktsü imlar saka tiyazübo menangzüksüla, ta ashi.

"PDP-i AFSPA ozüing

tesashi agientsü aser sepaitem agientsü atema maneni takhangba agüja arur. Kodanga matalokba dang nungibo menor ataloktsübaji tajungba, ajisüaka küm shia mapa crore anana agütsütsü aser nisung shia bank account nung sen lakh terpongungu (15) inoktsütsü ta tiyazü nangzükba amabo masütsüla. Parnoki khen dang süaka iba tenangzükba ya danga ataloktsü nungbo ibaji ajanga J&K nung nüburtem kanga anisüngzüksü. Nangzükba ama inyaktüsü atema Ministry of Home Affairs-i tang jail nung puoka aliba osangbenertem aser Kashmiri nung lanur meyirjang aikaji tama chiochtsüla," ta ashi.

Linük 5 nungi ketdangsertemi India Tir nem kuli kaket agütsü

New Delhi, Metsüremi/March 27 (Agencies): Bodhbarnü Rashtrapati Bhavan nung India Tir, Droupadi Murmu-i Philippines, Uzbekistan, Belarus, Kenya aser Georgia linüktem nungi Ambassador / High Commissioner ket nungi kuli

kakettem agizükogo, ta Rashtrapati Bhavan sangdong ka ajanga metetdaksü.

India Tir nem kuli kaket agütsürtemji Josel Francisco Ignacio, Ambassador of the Republic of Philippines; Sardor Rustambaev, Ambassador of Republic of Uzbekistan; Mikhail

Kasko, Ambassador of the Republic of Belarus; Peter Maina Munyiri, High Commissioner of the Republic of Kenya aser Vakhtang Jaoshvili, Ambassador of Georgia nung liasü, ta Rashtrapati Bhavan-i X ajanga metetdaksü.

Chhattisgarh nung tetsür ana densema Maoists telungpur 6 khaset

Raipur, March 27 (Agencies): Bodhbarnü Chhattisgarh state kübok Bijapur district nung security sepaitem aser Maoists telungpurtem tsüingda khatepdang tetsür ana densema Maoists telungpur trok khasetogo, ta ketdangsertemi metetdaksü.

ayong anasa security sepaitemi telungpurtem mita aoba mapang nung parnok ajurutepa khatep tenzük, ta Inspector General of Police (Bastar Range), Sundarraj P-i metetdaksü.

District Reserve Guard (DRG), Central Reserve Police Force (CRPF) aser elite unit CoBRA (Commando Battalion for Resolute Action) senteper

Maoists telungpurtem den khatap, iba sülen iba tesem nungjagi tetsür ana densema telungpur trok tasümgang den bomb aser raraba hadir aika angu, ta Sundarraj-isa metetdaksü.

Kasa rara nungji sepaitemi telungpurtem aika yirutsiogo aser sepaitemi maneni telungpur mita odar, ta paisa metetdaksü.



March 27, 2024 nü Malaysia nung India External Affairs Minister S. Jaishankar aser Malaysia Ato Kilonser, Anwar Ibrahim na senden amendang tangokba noksa nung angur.

PM-i March 31 nü Meerut nung Lok Sabha election nüboyim tenzüksü

New Delhi, March 27 (Agencies): March 31, 2024 nü Ato kilonser Narendra Modi-i Uttar Pradesh nung Lok Sabha Elections atema Meerut nungi nüboyim tenzüksü.

Modi-i lokti senden ka nung jembia election nüboyim tenzüksü. Meerut Lok Sabha menden atema BJP-i Arun Govil shimogo. 1980s mapang nung Ramanand Sagar indang Ramayan nung Govil-i Lord Ram shilem agia liasü.

BJP atema Meerut nung lokti sendenji kanga tongtimbang asütsü, kechiyong BJP-i anüolen Uttar Pradesh nungbo menden ajak nung takok angutsü nükjidong lir. BJP-i Lok Sabha election nung menden 370 tashi nungbo takok angutsü nükjidong yur tokteptsü.

Uttar Pradesh nung Lok Sabha menden 80 tashi lir aser

state nung BJP-i RLD, SBSP, Apna Dal (S), aser Nishad party tem den longjemer tokteptsü.

Uttar Pradesh nung Samajwadi Party lenir, Akhilesh Yadav-i opposition party tem den lokteper tokteptsü. Mayawati-i aniba BSP-ibo shinga den meloktepi tokteptsü.

2014 küm Lok Sabha election nung anüolen UP nung BJP-i menden 27 nungi menden 24 nung takok ngua liasü saka 2019 küm Lok Sabha election nungbo parnoki iba area nung menden 19 nung dang takok nguteta liasü.

2014 küm UP Lok Sabha election nung BJP-i menden 71 nung takok angu.

Lok Sabha election shilem tenet lemsar April 19 nungi June 1 tashi agitsü aser June 4 nü election osang sangdongtsü.

Kejriwal-i March 28 nü ajak jungkai adoktsütsü: Sunita Kejriwal



March 27, 2024 nü Delhi Chief Minister aser AAP tongti lenir, Arvind Kejriwal kinüngtsü, Sunita Kejriwal-i video conferencing ajanga osangbenertem den jembidang tangokba noksa nung angur.

New Delhi, March 27 (Agencies): Bodhbarnü Delhi Chief Minister aser AAP tongti lenir, Arvind Kejriwal kinüngtsü Sunita-i, Delhi excise policy ken o dak sendakba nung la kinüngbui court nung ajak jungkai adoka sangdongtsü, ta metetdaksü.

Video conferencing ajanga osangbenertem den jembidang Sunita-i, iba ochimashi dak sendakba senji kong aliar pai sangdongtsü, ta metetdaksü.

March 21, 2024 nü Enforcement Directorate (ED) ketdangsertem Arvind Kejriwal'er kidangi oa pa dang asüingdangyaba sülen pa apu. Tang pa ED ket nung lir.

Tamalen Delhi sorkar excise policy 2021-22 kübok yi shishilembartem nem licences agütsütsü atema sübokrem agi, ta tai tonglokja lir.

Sunita Kejriwal-i, "Anogo ana tejaklen Arvind Kejriwal-i shidi ka ajanga Water Minister Atishi den Delhi nung tzü aser kilentzü adokdak tebilemtsü lemsatepa liasü. Central sorkari pa anema ken o ka benokogo. Parnoki Delhi samatsüner asü? Parnoki nüburtem timtema lidaktsüner asü,?" ta asüingdang.

"Iba atema Arvind Kejriwal kanga jashir. Excise policy ken o nung ED-i 250 den teimba mita ogo. Parnoki iba ochimashi ken o indang sen bushir. Parnoki tang tashi kecha menguteter. Arvind Kejriwal-i, pai March 28 nü court nung ajak jungkai adoka metetdaksütsü ta shiogo," ta Sunita Kejriwal-i metetdaksü.

"Pai yi ochimashi indang senji kong aliar jungkai adoka metetdaksütsü. Pai kuli-a agütsütsü," ta laisa metetdaksü.

Ano külen Bodhbarnü Delhi BJP nungi telok kati Police Commissioner, Sanjay Arora ajurua pa dang ED ket nung lia Chief Minister Arvind Kejriwal-i par minister tem dangi yokba shidiji shidak asü masüar bushisüingdangtsüla, ta takhangba agütsüogo.

Osangbenertem den jembidang Delhi BJP Tir, Virendra Sachdeva-i, Delhi Police Headquarters nung Arora den semden amendang BJP-i, Kejriwal-i shidakba shidiji zülü asü ministers Atishi aser Saurabh Bharadwaj nati yazü jembidar bushisüingdangtsüla ta takhangba agütsüogo, ta metetdaksü.



TIR YIMYIM YIMOBILEM (EDITORIAL)

DIMAPUR YANGTEPNÜ, MARCH (METSÜREMI) 28, 2024

Shiba nem kechi atema vote agütsütsü ?

Linük nung tatar hoho tuluba tatar menden 543 aliba Lok sabha nung Nagaland nung alir ajak tenüng nung amentsü, jembitsü aser angatsü atema tatar (Member of Parliament) ka yoktsü asoshi taruba ita April 19 nü election agitsüba lir aser iba election nung tokteptsü atema BJP aser NNDP nati aniba telok telongjem PDA nungi Dr.Chumben Murry, Congress telok nungi S.Süpongmeren Jamir aser Independent candidate ka tenüng agi Hayithung Tungoe Lotha ta par aseme tenüng agüja lir. Ashiko, Independent candidate-ba jagibo kanga sashiabo metokteptsüa akok saka PDA aser Congress candidate na tsüngda yabo sashi-sashia tokteptsü amai apusodagi. Atangji, assembly election masü saka parliamentary election-ang asünungji tesem ajaklen candidate oagi nüboyima mesenzütetsüa akok saka nübortem rongnunga taoba election-tem nung ama tanga lu kecha mayim, election lu dang yima matai, election agiba anogo nung pei temeten mesendoki pei vote peisasa enoktsü asoshi pei pei polling station yima aotsü imlar. Atangji, election nung senso kati vote meinoktsüba atema temerenshi mali, anungji meinoktsünüra meinoktsütsü. Ajisüaka, enoktsüra shiba nem kechi atema enoktsür ta asüba tangatetba nung senso shiai shilem agitsüla. Atangji, election nung tokteper kija aser telok shia pei tangatetba aser nükjidong yur tokteper aser item tangatetba aser nükjidongtemji election nüboyim mapang jembir aser election temer takokertemi mapa küma inyaka aoer. Anungji, vote agütsütsü purtem asoshi tongtibangji election nung tokteper yimten teloktemji masü mesüra toktepsang candidate-jia masü saka election nung tokteper yimten telok mesüra candidate tangatetba aser nükjidongtemji lir. Atangji, tang tashibo election nung toktepertemi pei telok aser pei kija tangatetba aser nükjidong bentetbenteta metetdaksüba mangashir, ashiko election nung tokteptsü atema tenüng agütsüba aser meyipa agiba anogotem ajak tembanger külenang shitakba nüboyimbo tenzüksü asünungji, idangjiang election nung toktepertem tangatetba aser nükjidong tejangja yimjak nung metetdaksütsü südi. Ajisüaka, tang linük nung yimsü tesüdak BJP telok tangatetba aser nükjidong mataloki aliba atalokdaksütsü merangba onüktemjibo linük ajak asoshi sobaliba temzüng ozüng ka dang, Uniform Civil Code, asütsü aser tang amai küm shia khen assembly aser khen parliamentary election ta agia mamongtsü atema linük ajak nung assembly election ajak parliamentary election den külemi 'One Nation, One Election' tangatetba nung agitsü temzüng ozüng tasen yanglua inyaksü temulungtetba lir. Iba amaji tangar yimten teloktema pei pei tangatetba aser nükjidong alitsü. Anungji, vote agütsürtem atema telok aser nisungbaji masü saka telok aser nisungba tangatetba aser nükjidongtemji bilemdanga vote agütsütsü tim. Aji oda, tatishitsü agi, aseni linük ajaklen sobaliba ozüng ka dang asütsüla ta asübaji junger ta agizüktetra BJP aser par teloki aniba telok nem vote agütsütsüla, aji mesüra linük ajaklen sobaliba ozüng ka dang asütsüla ta asüba ola magizüktetertemi Congress aser parnokni aniba teloktem nem vote agütsütsüla. Iba amaji election nung vote agütsütsüba yabo sen agütsüba agi mesüra government mapai yoktsü nangzükba agi mesüra amokmerenba agi mesüra kinunger aser yimtsür yimer asüba agi masü, saka election nung tokteper telok aser candidate tangatetba aser nükjidong angadanger enoktsür. Election agiba ya asayamenüba mapa ka masü saka iba yagi asen alidak tzü mopong melenshidaksütsü, iba yagi asenok ajak atema sentong yanglutsü, iba yagi asenok terenlok mapatem nung tesüleni atsüngzüksü asü, tejakleni aotsüar, aji lemtetsü. Aji oda, sen tera mesüra mapa tilaka yong vote yoker, lenmang tamajung nung jajatsü, tzü alia ajemtsü aser mopong tamajung achitsü aser asen yimten aser sobaliba nung asen sünütsü mesütetsüsa asensasa asen alena ayutsüsa mesüi tangatetba nung tasü itta pei vote peisasa enoktsü bilema lidi.

OLEMSABANG

YISU KANGKI NUNG ANGENLOKTSÜ PILATI MEMULUNG

~ Rev. S. Temjen longkumer, Chümoukedima.

Yihuda nübur madak Rome Sorkar yimsüsüba mesüng arubaji B.C. 63 nung liasü. Aji Yihbuda nunger adianu ana, teti – tenu tsüngda temaba putir menden raktepba ajanga atalok. Pilat ya Yihuda nunger madak governor asütsü A.D. 26 meta Yirusalemi aru. Pa mapang Yihuda nungeri Yisu Kangki nung südaktsü.

Sobaliba aser tamangba yimsü madak Yihuda puti-nungertemji kibur liasü. Saka nisung ka tasüba agi merenshitsü parnok nem tashi aser temeten magütsü. Ajibo Rome sorkar ket nung dang lias. Anungji Yisu kangki nung angenloktsü parnokni pa pilat dangi anir aru.

Pilat tsüngdang parnokni Yisu aitsümesoa ashi (1) Iba nisung yagi ozü kin mashileni anir (2) Kaisar nem alimelen (tax) tagütsü ta pai ashir (3) Pa Tsüngrem anemer ka (4) Pai tenlaki raksatsü shiner (5) Pai pei sasa Tsüngrem chir aser Messiah ta jembir.

Pilati Yisu dang asüngdang. Naia kechi ashir? Yisui langzü (1) Kü Chuba yimli iba lima meyong masü (2) Ni Ochi indang kuli agütsütsü aso aser aji atema ni alimai aru (3) Ni alima rara adokdaksütsü aru masü saka yimjung, temeim aser taochi bener aru.

Yisui jembiba nungi Pilati angatet aser ashi (1) Yisuji Yimli anemer nisung ka masü (2) Iba nisung dak tai kecha mali (3) Mokokachi agi parnokni Yisu bendanga agütsür ta ni metet (4) Iba ama kuli agi dangbo Rome Sorkar obendangba ozüng agi Pa asütsü malang/metemsü. Pilati Yisu kümzüksü kanga merang, saka parnokni pai ashiba manga. Ibaji benjong mapang liasü, benjong mapang sorkari nisung ka tepoukdak nungi chioker. Anungji iba maongkaji Yisu nem agütsüdi ta asüngdang, saka parnokni Yisu kangki nung angenlokang ta ayimten.

Tang Pilat terata nung alidang, pa kinungtsü nungi osang ka aru. "Na kümdangang! Kümdangang! Nai iba nisung dak tekongshi, Pa temeshi lir". Aji Tsüngrem Tanelai la dang mangdang nung jembiba liasü.

Tesüsa, parnokni Yisu dak azükba agi jangra atemtsü aser Pa chiocksü ta Pilati bilem, aser yamaji inyaksü mela saka yamaji inyakdang parnok taliang ain adokba ngua. Pilat kanga jashiadok. Anungji Yisu dak tasütsü langa kecha tai maket ta sayuba temaitsü Pilati tzü agi pa teka metsükdok aser telok nem Yisu bendanga agütsü.

Idangyongjisa parnokni Yisu Kalvari tenemi anir ao aser taochi makai pa kangki nung meta. Pilater sepai tanishir tulutiba, shiba tetenzük nungi tatem tashi parnok sülen anitaka liasü pai ashi, "Atangji iba nisung Tsüngrem Chir liasü."

Yisu asü, leper nung arem aser Pai shina yutsüba ama asemnübuba nung shia aru. Pa asenok den lir.

(Source: *Tasen Lai Osangtajung Kakettem*)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nicaragua nung sorkari Easter dak sendakba sentongtem thinentesür



Yaküm Nicaragua nung Khristantem temeshi hopta nung yimdong süa jajadang tangokba noksa nung angur.

March 27, 2024: Temeshi hopta mapang nung Nicaragua linük nung Ortega-i aniba sorkari Khristantem temeshi hopta sentongtem mita repranger.

Attorney, Martha Patricia Molina-i ashiba agi, sorkari Easter mongpu nung Khristantem procession sentong 4,800 thinentesüogo, ta International Christian Concern (ICC)-i metetdaksü.

Nicaragua nung Easter mongpu nung Khristantem atema yimdong süa jajaba ya kanga tongtibang sentong ka lir, ajisüaka sorkar ketdangsertemi item sentong thinentesüogo.

Molina-i Facebook post ka ajanga, sorkar ketdangsertemi yimti-yimdong nung item sentong agitsü memelayonga Arogotemi Tenla ki telung nung procession agitsü renemogo, ta metetdaksü.

Ano Arogo karibo peipei kiyong nung item sentong agitsü lemteta liasü saka ibajia ketdangsertemi thinentesüogo.

Nicaragua nung sorkari

meimchir temedentem anema inyakba atema Arogotemi aitsüba aser 2019 küm longkak aiter kaketshirtem Arogoi jenokdaksütsü lemtetba agi sorkari Arogotem anema inyaker.

Taküm küm tetenzüklen International Religious Freedom Summit (IRF Summit) nung jembidang Molina-i Nicaragua nung tensa tamajungba akümba osang metetdakja liasü.

IRF Summit nungsa Khristan putir kati, "Onoki organization balala aser democracy linüktem dang item osang sangdonger aser Nicaragua nung aliba Arogo aser nüburttem dak ranglokdaksüner," ta metetdakja liasü.

Paisa, "Küm 500 tejaklen Nicaragua nung Arogo tenzükba sülen linük puti otsü nung Khristantem atema tang tensa ya tamajungba," ta metetdaksü.

2022 küm July ita nung Nicaragua-i Missionaries of Charity nungi nun 18 anenja liasü. Nicaragua nunga 1988

küm MoC tenzükba liasü.

Nun temji police-i meiner arrtsüleni aoba sülen Costa Rica telungi idakja liasü.

2022 küm tetenzüklen Ortega sorkari Vatican ambassador to Nicaragua-a anentsüogo.

2019 küm U.S. Department of State-i Special Watchlist (SWL) nung Nicaragua linük-a züngok aser 2022 küm meimchir temeden atema inyakba teloktemi iba linük ya Countries of Particular Concern (CPC) list nung züngoktsü benoka liasü.

Ano külen U.S. Commission on International Religious Freedom (USCIRF)-ia 2020 küm nungi parnok indang report nung Nicaragua züngoker.

Nicaragua ya CPC list nung züngoktsü atema mepishia 2023 küm report nung USCIRF-i, "2018 küm longkak aitba mapang nungi tenzükba Khristan lenirtem anema inyaker saka sorkar ketdangsertemi mezüng Khristan lenirtem pua tepuokdak ayubaji 2022 küm liasü," ta metetdaksü.

Vietnam nung pastor ka sür lia angu

March 27, 2024: March 8, 2024 nü Vietnam nung Pastor, Y Bum Bya sür lia angu; ketdangsertemibo pai pasasa soseta asü ta sangdong ajisüaka Evangelical Khristantemibo ibaji mamananer, ta International Christian Concern (ICC)-i metetdaksü.

Vietnam nung Y Bum Bya ya Dal Lak Province nung aliba Evangelical Church of Christ nung pastor liasü. Küm aika pai reshikangshi ajangshia aruogo aser yaküm December ita nunga sorkar ketdangsertemi pa dak züka liasü.

Iba mapang nungji police-i pa indang phone meshizük aser nai Arogo metoktsüra na tepsettsü, ta pa amokmerena liasü.

Pastor Y Bum Bya dak maneni azükba sülen pai Arogo toktsü aser ibaji Dak Lak Security & Order Program nunga sayua liasü.

Osang angazükba agi, tamalen pastor-i phone amshia noksa den video tangoka par linük nung tatalokbatemji alima den lemsatepba agi smartphone amshitsü pa dang memela.

March 8, 2024 nü police-i phone ajanga Y Bum Bya dang nü nem phone meyipa agütsütsü atema na ajuruner, ta metetdakja liasü.

Pa kidangi shilangba mapang nung police-i par kidang o lemteptsü memelung saka anasa aliba leper ka nung ang o lemteptsü, ta ashi.

Pastor samaba sülen bushitepdang kiyongertemi pa

tasü mangji leper ka nung alenseta sür lia angu. Sorkar ketdangsertemi pastor-i pasasa soseta asü ta sangdong, ajisüaka par medemertem aser kinüngertemi ibaji mamanger.

Osangbener den jembidang par medemer kati, "Pa kanga ajemalu nisung ka liasü aser pai Kibuba meima liasü. Tsüngrem meimertemi kodanga soseta masütsü, kechiyong soseta asübaji nisung tepsetba den kasa. Parnoki pa kanga sempaa liasü. Iba ya Evangelical Church of Christ nung züngsemtem amokmerentsü atema inyakba lir. Tesüiba küm aika tejakdang nungi parnoki iba Arogo samatsünüa liasü," ta metetdaksü.

U.S. International Religious

ANO GO ABEN TSÜNGREM DEN

Tanela Agi Asüngba

"Yi, koba nung teraratsü lir, aji agi temesepma, saka Tanela agi sünga liang." - Efesa 5 : 18.

Tamanger ka anogo shia Tanela agi sünga alibaji yimya mapa ka ama alitsüla. Ibai tanga mapang nung meinyakba mapa ka inyaktsü atema sempet balaka agütsüba masü.

Kümzükba anogo nungi Tanela Temeshi tamanger shia dak alir. Aser Khristan taküm ka atema Tsüngremi agütsüba tashi tongtibang rongnung kaji tanüla temeshi yokbaji lir. Shiba dak Tanela Temeshi mali pa Khrista meyong masü. (Rom 8 : 9).

Tanabuba Tanela Temeshi mapaji tamanger tasen Khrista temang nung baptitsübaji lir. Iba mapa ya alima ajak nung tamanger shia dak ataloker. Iba nungi adokbaji tamanger shia Khrista temang nung Kibuba Yisu den lungjemer aser züngsem shia den lungjemer. Kodang iba mapa renemdir Tanela Temeshi temaitsü ajener aser Tsüngremer kidang tenzüktsü asoshi temsüa kümdaktsür.

Tanela Temeshii tamanger mapa aser taküm azüoker. Tanela agi asüngba nung temenen nangzükba dena lir. Tanela tazüokba ajak agütsüba den alir. Tsüngrem nem tenüngsang agütsüba dena lir. Tanela Temeshi ajanga Khrista kü dak aliba ain agi ni Tsüngrem mapa inyaktsüla.

Oba, Ne Tanela Temeshi asoshi aser maneni Pa aser Pa ain agi anishidaktsüba asoshi, Ne tenüing asanger.

April 7 nü linük tesem ajaklen lumia sarasademtsü ayongzüker

Dimapur, Metsüremi/March 27 (TYO): March 13, 2024 nü Ao Baptist Church, Diphupar A nung ayongzüka agiba "Prayer for the Nation" sentong nung Naga Arogotem

nungi lenirtemi mepishiba ama April 7 nü linük tesem ajaklen lumia sarasademtsü ayongzüker, ta Bodhbarnü Prayer for the Nation Organizing Committee Convener Rev. Seksim Kasar, Moderator Dr. S. Akatoli Chishi aser Recording Secretary, Rev. Fr. Philip Yampvuthung nungeri külem sangdong ka ajanga metetdaksü.

April 7 nü Naga nung Khristantem aliba tesem ajak aser Arogotem nung anogo ka piyong Naga linük atema lumia sarasademtsü parnoki mepishia liasü, ta sangdong nung shia lir.

"Onoki denomination balala nungi Arogotem nung tekolakpurtem dang parnok kübok aliba Arogotem nem iba osang metetdaksütsü mepishir. Tsüngrem taochi ajanga Naga nung dang temenen atoktsü aser mapang talangka nungi yongyaa aliba India-Naga yimtenren ken o tekeraba nung latettsü atema anogo ka piyong lumia sarasademtsü Arogotem nem metetdaksüner," ta kasa sangdong ajanga metetdaksü.

Freedom Report ajanga ashiba agi, Vietnam linük temzüng nung senso ajak nem yimsü dak sendakba temeden agüja lir, ajisüaka sorkari yimsü dak sendakba inyaksangshi aika nokdang.

U.S. State Department-i, "Iba linük tesem balala nung sorkar ketdangsertemi yimsü dak sendakba inyaksangshi mita repranger, asüngdangyar, lenirtem apur aser nija kar anema inyaker," ta metetdaksü.

U.S. Secretary of State, Antony Blinken-i Vietnam linük ya Special Watch List nung züngoka lir, ajisüaka Vietnam nung Khristantem aser alima linüktemi Vietnam ya Country of Particular Concern (CPC) List nung züngoktsü akhangar.

**AO OSHI ANGAZÜKDAK:
TANÜ ANGAZÜKTSÜBA OJANG**



Süiren

(adv) atalokyonga aruba otsü (history)

* Asenok Ao kin süiren indang ajakibo memetet.

Süirkütsü

(v) süitematoker külen (after passing of time)

* Telok chiyongba süirkütsür külen mapa tenzük.

OLONG PAITEP # 6740

15x15 crossword grid with numbers 1-19 indicating starting positions for clues.

TIPIEN

- 2. Teburtemi tejak nung awaba - (8)
6. T ___ em - (3)
8. Tzüük ayudak - (3)
9. Nüingdakba dang timba - (6)
11. Züjina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüingda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6739 TELANGZÜBA

TIPIEN :

- 1. Telok, 4. Aluru, 6. Ozüing, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü, 5. Lenti, 7. Tajangzük, 11. Teronem, 12. Sempa, 13. Jahaz.

KHEN SHISADANGDI

ALOKBA O SOBANGBA NA ELECTION INDANG SENSÄK-ASEMER

Alokba : Ohiiii... Temba ano 19th April nungji asen Naga lima nung election agitsü ta osang angashir...Anungji na-a koba Party nem Vote agütsütsü bilemdar...???

Sobang : Eeeessshh... Temba asen Naga lima nung Party balaka kecha mali ado.... Election-i ayidang Party balala ticket bener aiyongjia... Adoker külenbo ajunga Party ka dang küma-adokji... Kechi Party-a ta ashitsü...??? Ayeee... Temba sen koba Party-i teimbaagütsüdir iba Party nemji agütsütsü ta bilemdar nooo.

Alokba : Ayaaa... Temba ashir dang ashi joko asenoka sen dak dang rangloker malitsüla aja... India lima nung ya Hindu yimsü dak alema tanga yimsü kecha amangtsü makok... India lima nung Hindi oshi dang jembitsü... Nashi metepsettsü... Deobar nü akhi anogo amai sorkar mapatong ajunga inyaksü...Christmas anogo nunga office alitsü... ta tasa tapu-tapu atongdar...!!! Anungji kanga shisa kaa bilemdanger vote agütsübilema alitsüla ako.

- L. Kika pongener.

Meghalaya nung candidate takartiba ji Vincent Pala lir



Shillong, March 27, 2024

(Agencies): Meghalaya nung politician takartem rongnung mezüingbubaji Shillong constituency nungi Lok Sabha member aser Congress candidate Vincent H. Pala ka lir.

Maneni, ozüing anema ken o benoka aliba candidate rongnung Regional Democratic Alliance (RDA) candidate Robertjune Kharjahnin aser NPP candidate Ampareen Lyngdoh na dena lir.

Pala ya Meghalaya Pradesh Congress Committee president lir aser pa o kinungtsü na rongsen Rs 100 crore tema lir.

Pala indang movable assets ji Rs 1,59,27,412 aser pa kinungtsü indang Rs 91,50,217 lir. Pala meyong kiojen aser rongsen aika lir aser iba nung gari aser kimungtem dena lir.

Kharjahnin anema Meghalaya Police Act of 2010 nung Section 102 kübok ken o benoka lir.

Pa indang immovable assets

Rs 19,264,94 lir aser current market value Rs 50,00,000 lir.

NPP candidate aser Tura nungi MP has Agatha Sangma indang movable assets Rs 52,78,453 lir. La ket nung gari mali saka ali aser kiojentem lir.

Agatha Sangma den tokteper Saleng Sangma ket nung gari pezü aser prangpong ana lir. Saleng indang movable assets Rs 1,80,49,264 lir. Pa ket nung Rs 2,20,00,000 alang ali aser kiojentem lir.

Taoba Assam sorkar ketdangtsür ka süpokrem agiba atema apu

Guwahati, March 27, 2024

(Agencies): Darrang district nung Directorate of Vigilance & Anti Corruption ketdangtsürtemi taoba sorkar ketdangtsür ka puogo.

Iba nisung ya Tapan Nath ta jangjaogo aser pa ya Lot Mandal inyaka liasü.

Darrang kübok Dalgaon nung aliba Circle office anasa Hotel Titan nung Nath apu. Pai nisung ka dang nungi Rs 1500 süpokrem meshia agidang apu.

Nath-i iba nisung dang Rs 5000 meshi aser iba jagi police dang nungi teyari meshia liasü.

Kulikaket kar yanglutsü atema Nath-i süpokrem meshiba liasü.

Nath den yaritepertem aputsü atema bushisüingdang ka tenzükogo. Talisa taoba mapang sorkar ketdangtsür kati internal activities kar nung shilem agiba atema bushisüingdang südar.

Amit Shah-i April 6 nü Guwahati semdangtsü: CM Sarma

Guwahati, March 27, 2024

(Agencies): Union home minister Amit Shah-i April 6 nü Lok Sabha election nüboyimtsü atema Guwahati semdangtsü akok ta Assam chief minister Himanta Biswa Sarma-i ashi.

Prime Minister Narendra Modi aser Bharatiya Janata Party (BJP) national president JP Nadda natia yakta Assam semdangtsü ta CM Sarma-i ashi.

Assam nung Lok Sabha

elections shilem asem lemsar agitsü. Lok Sabha menden 14 atema April 19, April 26 aser May 7 anogotem polling asütsü.

2024 Lok Sabha elections nung Assam nung ruling BJP aser opposition Congress den regional party balala tsüingda tokteptsü.

2019 Lok Sabha elections nung BJP-i Assam parliamentary constituencies 14 nungi 9 nung takok ngua liasü.

BJP sülen Congress-i menden 3 aser All India United

Democratic Front (AIUDF)-i menden 1 nung takok angu.

Phase 1: Polling Date - April 19

Constituencies: Kaziranga, Sonitpur, Lakhimpur, Dibrugarh, Jorhat

Phase 2: Polling Date - April 26

Constituencies: Darrang-Udalguri, Diphu, Karimganj, Silchar, Nagaon

Phase 3: Polling Date - May 7

Constituencies: Kokrajhar, Dhubri, Barpeta, Guwahati

Th Basanta Kumar-i Inner Manipur atema nomination süogo



April 19 nü Inner Manipur Lok Sabha parliamentary constituency ateam election agitsü.

Th Basanta Kumar Singh ya Manipur nung tang teinyakdak MLA aser Education Minister lir. Pa ya taoba Union Minister Th Chaoba Singh'er jabaso lir.

Basanta Kumar ya Imphal West district kübok Utlou nungi lir aser pa ya retired Indian Police Service (IPS) officer ka lir.

Inner Manipur parliamentary menden nung BJP candidate-i takok angutsü ta Manipur CM Biren Singh-i ashi.

"Central leaders teyari ajanga ni Manipur nung yimjung bener arutsü merangtsü" ta Basanta Kumar-ia ashi.

Imphal, March 27, 2024

(Agencies): Inner Manipur Lok Sabha constituency atema Bharatiya Janata Party (BJP) candidate Thounaojam Basanta

Kumar Singh-i Bodbarnü nomination papers agütsüogo.

Iba mapang Manipur chief minister N Biren Singh-i Thounaojam meina ao.

UN pangzüng agi Gaza ceasefire jembishinü raksatsü: Israel

Tel Aviv, Metsüremi/March 27 (Agencies): Gaza-i Israel den rara anena atatsü atema tang benoka aliba Hamas-i magizükba ajanga UN Security Council pangzüng nung tekeratiba nung ceasefire khangba aliba ajanga teraksa agütsüba sayur, ta Israel-i ashi. Palestine nunger telungpuri kodanga mataloktsü akhangba nem Israel-i mokokdaksütsü, ta Ato Kilonser Benjamin Netanyahu indang office ajanga ashi.

Parnoki akhangba nung rara tembangtsü aser Israel sepai ajunga anizüker aotsü dena lir.

Israel-i sangdongba ya lenla ajak nung tim masü ta US-i shiogo.

Hombarnü Security Council nung vote magitepdang yongi Hamas telangzüba renemer liasü, ta US state department odongtar kati ashi.

Israel mitkari hopta ana tejakdang Nuseirat refugee camp tsüinglanglen longpok ka amakdang Hamas indang military wing deputy leader Marwan Issa tepsetba jangjaogo, ta ashi.

"Onoki itdangiter inyakyim ajak reprangogo. Marwan Issa ya tepsetogo," ta odongtar Rear Admiral Daniel Hagari-i ashi.

Hamas political official Izzat al-Rishq-ibo Israel-i jembiba

nung temulung melemteter aser par telok indang mitkar lenirtemi shitettsü ta ashi.

Rear Admiral Hagari-i Issa ya Hamas telok indang "number three" aser October 7 nü Israel south tsütsü Hamas teloki amakba nung tayonger ka liasü ta ashir, kong nisung 1,200 shi tepset aser 253 pua bener ao.

Iba sülen Gaza nung nisung 32,400 dak tema tepsetogo aser tesüiba ghonda 24 tsüngta nisung 81 asü, ta Hamas meyong health ministry ajanga ashir.

Gaza nung rara aliba tangsa ceasefire alitsü ayongzüka UN Security Council nung pangzüng ka tang mezüngbuba renemba nung Israel kangasa mepelar.

UK densema council züngsem 14-i iba text bhukuma vote agütsü, kong pua alir tanüngba ajak talenba makai chioktsü aser humanitarian aid deliveries ulushitsü takhangba agüja lir.

October 7 nü amakba atema pangzüng nung Hamas maitsüba asoshi Israel indang tembar aser mitkar yariba linük US-i aitsü.

Ajisüaka Israel-i raraba yimya nung tali jashiba temaitsü ka ama US-i vote agitepba nung shilem magi aser tongtipang nükjidong tem bhukumer ta ashi.

Iba tejashi nung Israel ketdangsürtemi Washington

semadanga Rafah yimti amaktsü asoshi jembishinütsü aliba sentong athi. Iba yimti nung tashi ajak amshia amaknungbo meimchirtem kanga akoksatsü ta ashir, kong nisung million ka dak tema jenoka lir.

Mapang tatsüka lir Hamas-i sangdong ka nung tang tesüsa rara anentsü sentong benokba magizük, koba US, Qatar aser Egypt nungi ketdangsürtemi Doha nung jembishinüba liasü.

Iba telok yagi teti asoshi ceasefire akhangba nung Gaza nungi Israel sepai ajunga ainshitsü aser tesem balala nung prokshia aliba Palestine nunger ajak kidangi meyipa shilangtsü shia aliba nung tanü tashi nokdaka lir ta ashi.

Mongulbarnep Israel ato kilonser indang office ajanga ashiba agi, Hamas telok ken o jembishinüba nung parnok tejangraba maliba sayur aser UN Security Council indang pangzüng ajanga teraksa agütsüba shidak ta sayur.

"Hamas-i kodanga mataloktsü akhangba Israel-i mataloktsütsü. Israel-i pei rara nükjidong ataloktsü lenmang bushitsü, Hamas mitkar aser sorkar tashi samatsütsü, pua alir ajak chioktsü aser tarutsü nung Gaza ya Israel nübur asoshi timtem maliba linük ka kumdaksütsü," ta ashi.

China-i linük nung ki o jen yanglutsütsü: Sri Lanka PM



Colombo, Metsüremi/March 27 (Agencies): China-i linük indang tongtipang deep sea port aser linük yimtiba airport yanglutsütsü nangzükogo, ta Sri Lanka ato kilonser-i Bodhbarnü ashi.

Sri Lanka asoshi sen aputsür linük tulutiba, China-i Sri Lanka indang external debt yanglushiba nung yaritsü, ta Ato Kilonser Dinesh Gunawardena-i ashi, koba IMF nungi sen billion \$2.9 aputsü asoshi tongtipang condition ka lir.

Beijing-i iba indang yimjak nungbo mashi saka China-i sen apuja aliba atoktsübo memulung saka mapang atsülangtsü aser sen tetemlok atema mera kar agitsü akok, ta Sri Lanka ketdangsürtemi shia lir.

2022 küm Sri Lanka-i bendang lima nungi tongtipang osettsüset bener arutsü atema foreign exchange nung sen agiba aser sentsüh sen \$46 billion foreign debt lir ta sangdonga liasü.

Iba sülen ita aika longkak aitba ajanga iba mapang tir inyaka alisang Gotabaya Rajapaksa menden nungi alutsüsa akum.

China-i Sri Lanka indang 'debt restructuring process' nung China-i maneni yaritsü

asere Sri Lanka indang rongsenketzüng renlokba nung yaritsü ta Ato Kilonser Li Qiang-i nangzük ta Gunawardena indang office-i ashi.

Colombo International Airport aser Hambantota rongnendak tesem yangluba nung yaritsü Beijing-i maongka agütsüogo, ta Gunawardena-i ashi saka iba dak tali rasaa mashi.

Sri Lanka indang 'sovereign debt default' asüba sülen Japan nungeri senotsü teyari agüja Colombo airport ulushiba maparen anena lir.

Sri Lanka south tsütsü Hambantota rongnendak tesem ya 2017 küm China sorkar meyong company ka nem küm 99 atema sen billion \$1.12 yong agütsü, aser iba yongji India mepela.

Hambantota nung China tetsüng ajemokba ajanga Indian Ocean nung par tziyim sepai tashi ulushitsü, ta India aser United States tebilemtsü akar.

Sri Lanka-i par indang rongnendak tesemtem ya mitkar maparen atema mamshitsü ta shijen ashir, saka Hambantota nung Chinese research vessels anenba atema New Delhi-i tai apu.

Tunisia nung nisung 4 tasüba agi merenshitsü obendang agütsü

Tunis, Metsüremi/March 27 (Agencies): Küm 11 tejakdang opposition lenir Chokri Belaid tepsetba dak sendakba nung Tunisia nung okadak kati nisung pezü tasüba agi merenshitsü atema obendang agütsüogo.

Parnok nem obendang agütsüba ya anti-terror judicial division indang deputy public prosecutor-i Bodhbarnü metetdakja liasü. Ken o nung nisung 23 aitsüogo aser parnok ya küm ana nungi tenzüker küm 120 tashi tepuokdak ayutsü oebdang agütsür lir aser nisung pongu nem taitok agütsüogo.

Mogolbar aonung Belaid pusemertem aika Tunis nung iba okadak anasa adenshir ochi obendang khangba yimiyim ayima liasü.

Parnoki "Chokri is always alive," aser "we are loyal to the blood of the martyrs" ta yimiyim ayima liasü.

Belaid ya 2013 küm February 6 nü par kima pa indang gari nung mener aliba mapang khaset. Democratic Patriots Party indang secretary-general ya iba mapang sorkar kümteter aliba Islamist party Ennahdha anemer ka liasü. Sorkari secularist tem anema inyaksangshiba mangu ama toktsür ta shia pai sorkar anema nokdaka liasü.

Pa den asüpila sentong agiba ya Tunisia nung lokti

senden tulutiba rongnung ka liasü, kong nisung million kati yimtung nung adoka mang ayim aser iba sülen nüburtemi longkak aita liasü.

2011 küm Tir Zine El Abidine Ben Ali anema nokdak pa atsüngtokba sülen mapang tatsüka dang lir pa tepsetba ajanga Tunisia nung yimden yimsüsüba tsütsü mepetmesü tulutiba rongnung ka ataloka liasü liasü.

Iba sülen ita ishika dang lir opposition lenir pan-Arab leftist Mohamed Brahimi-a tepset aser iba ajanga sorkar

loksatsüsa aküm.

Ketdangsürtemi lenir ana tepsetba ya Salafist telok Ansar al-Sharia dak tai tonglokja liasü. Iba telok ya al-Qaeda den sendaka alitsü ta temulung melemi liasü aser 2013 küm August ita kiralongrar telok ka kümtsüogo.

Belaid'er kinungertem aser secularist yimden yimsüsürtemi pa tepsetba ya Ennahdha party lenirtem dak tai tonglokja liasü.

Ajisüaka Ennahdha-i iba taitsüba ya magizük aser Belaid tepsetba nung parnok shilem kecha mali ta shiogo.

Pakistan: China nunger 5 tepsetertem DNA tendangtsü

Islamabad, Metsüremi/March 27 (Agencies): Pakistan northwest len lendong tulu ka atalokba sülen pei temang nung bomb alenoker pokdaksürtem indang DNA tendangtsü, ta Pakistan nunger ketdangtsürtemi metetdaksüogo.

Shangla district nung convoy ka amakba sülen China nunger pongu aser gari anir local ka tepseta liasü. Iba tesem ya kanga dang tongtibang lir kechiyong iba ya China-Pakistan Economic Corridor (Cpec) nung shilem ka lir aser lenmang aser power plants amala yangluba project balala nung China

nunger mapa inyakerem aika sendaka lir, koba Pakistan rongsenketzüng atema kanga tongtibang lir.

Lendong nung asürtem rongnung engineer aser aayangertem densema liasü, aser parnok ya Pakistan nung hydropower project tulutiba Dasu Dam-i police temi meiner oya aliba mapang maka liasü.

Ken o bushisüngdangba indang China nunger ketdangsürtem nem metetdaksüogo aser parnok Pakistan nunger ketdangsürtem den longjemer ken o maneni bushisüngdangtsü atema lendong atalokba tesemi

mongintem yoktsü. Iba convoy amakerem nem teyari agütsürtem bushiba mapang ka lir.

Tang tashi nung telok kati danga iba convoy amakba nangzüka mali, ajisüaka separatists teloktem aser Pakistani Taliban indang faction kati amak asütsü ta bilemer. Tehreek-e-Taliban Pakistan (TTP) faction, Gul Bahadur, shirnok Afghan Taliban den sendaktepa lir parnok-i iba lendong atalokba nung parnok shilem kecha mali ta shiogo.

China-i Mongolbarnü iba convoy amakba aitsüogo. "Pakistan nung Chinese embassy aser consulate temi

iba kiralongrar inyakyim ya aitsür aser linük anaprongla nungi asür kinungertem den asükhu lemsateper," ta embassy-i sangdong ka ajanga metetdaksü.

Kasa mapang nung Pakistan Ato Kilonser Shehbaz Sharif-ia, Chinese ambassador Jiang Zaidong den sensaksemba mapang ken o takartiba nung bentettsü merangtsü ta tenangzükba agütsüogo.

Cpec dak sendakba mapa balala nung sotaka aliba China nungertem kümtem tsüngda maka arudar. 2021 kuma China nunger teku densema nisung 13 tepsetogo.

NBA-i ayongzüka WABC Level-1 Program agiogo

Dimapur, Metsüremi/ March 27 (TYO): Basketball Federation of India aser FIBA den longjemer Nagaland Basketball Association-i ayongzüka basketball coach tem atema March 16 nungi 21 tashi WABC Level-1 Program ka agiogo. Iba training sentong nung nisung 15-i shilem agia liasü.

Training ya FIBA Facilitator Arnika Gujar-Patili agüja liasü. La ya India nung basketball asaya nung nungtugu nisung ka lir, shiba lanuwa nungi asaya tenzüka liasü. Lai naroküm balala agizüka lir kong Maharashtra sorkari "Shiv Chatrapati Award" agütsüba densema lir. Arnika-i international jenjang nunga takok tajung nguogo aser 2006 Commonwealth Games nung "Women-Three Points Made" nung shilem tajung agia liasü. La tang Arnikas Sports Academy

CEO lir aser iba den India tetsür team coach asüba den international championships balala nung head coach ama inyakdar.

Lai takok tajung ngur alibatem rongnung NCAA scholarships anguba aser India aser bendanglen coach mapa balala inyakba densema lir. Arnika nükjidongji la indang academy ajanga linük ajunga nung lanur asayartem aser coaching staff tem ajungkettsü atema lir.

Training ajanga coach tem nem parnok sempet arantgetshitsü aser coaching dak sendakba nung parnok shisatsü renloksü atema teyari agütsüogo. Training sentong nung shilem agirtemi, tasa tasen angazüksü atema parnok nem maongka agütsüba atema kanga pelaba lemsatepogo aser iba ajanga tasa aika angazüker aliba asayartem anitettsü imlaba

lemsatep. Trainees tem rongnung Reena Rai-i, "WABC level one course ajanga aika angazükogo. Iba ajanga basketball aser coaching indang angazükdaktsüba dang masü saka onoki angazüker aliba kar intoktsü atema maongka agütsüogo," ta ashi.

Alima ajunga nung aser talisa northeast India nung basketball asaya kanga kara renloka aoba mapa tanga mapang dang nungi tang qualified coach tem kanga tenüngdakba kümogo. Iba sentong ajanga grassroots level nung lanur basketball asayartem anitettsü bendanga agütsür aliba sayur. Coach team nem tenüngdakba shisatsütem agüja Nagaland Basketball Association-i iba asaya renloka odaktsütsü aser iba tesem nung iba asaya nungtugu kümduktsütsü nükjidong lir.

4buba Lt. G. Rio Memorial asayamung tananübuba anogo asaya osang



(L) MERIBEMO KIKON ; (R) SHAHIL

Dimapur, Metsüremi/March 27 (TYO): Tang asaya aliba 4buba Lt. G. Rio Memorial men's U19 inter-district tournament 2024 nung Bodhbarnü Nagaland Cricket Stadium nung Wokha aser Tseminyu na asayaba Wokha-i run 140 agiogo.

Mezung batting amenba sülen Wokha team-i run 169 yaglua liasü. Wokha team batsmen tem rongnungi Liren Jungio-i run 22, Mharen-i run 19 aser Renben Kikon-i run 17 yaglua liasü.

Tseminyu atema Gwakenye Khing-i wicket 4 agi, Achyelo Semp aser Sonyelo Kent nati wicket anana aser Yhunilo Kent o Sobinlo Semy nati wicket kaka agia Wokha team nem over 29.1 nung run 169 dang yangludaktsü.

Ajisüaka asaya tanabuba shilem nung Tseminyu team-i junga masayatet aser parnoki over 11.3 nung run 29 dang yanglur asayar ajak out süatok. Wokha team atema Meribemo Kikon-i ball kanga junga ona pai wicket 5 agi aser asayamung nung mezungbuba Hat-trick

agia liasü. Tseminyu atema Sonyelo Kent-i dang tera junga asayateta pai run 18 yanglu.

Bodhbarnüsa Sovima Cricket Ground nung Zunheboto-i wicket 5 agi Peren kokogo.

Toss koka mezung batting amentsü shimba sülen Peren team-i imla aliba ama junga masayatet aser mapang shia asayar out süa parnoki over 22.5 nung run 53 dang yangluteta liasü. Parnok rongnungi Anurag-i dang junga asaya pai run 21 yanglu.

Zunheboto team bowler tem rongnungi Rahul aser Raja nati wicket asemsem agi, Aarush-i 2 aser Oloka-i wicket ka agia liasü.

Zunheboto-ia asaya junga metenzüktet aser asayar pongu kanga kara out süadok, ajisüaka Raja-i out mesüi run 24 yanglua team tejakdangi ani aser parnoki asaya over 14 nung koka liasü. Iba asaya akokba sülen Zunheboto team Semi-Final-i iogo.

March 28 nü asaya:

Chümoukedima vs Peren (Nagaland Cricket Stadium | 9:00 AM)

Niuland vs Tseminyu (Sovima Cricket Ground | 9:00 AM).

Premier League-i 2024 PL Hall of Fame atema nisung 15 shimogo

Metsüremi/March 27, 2024 (Agencies): Premier League-i Hombarnü 2024 Hall of Fame atema shortlist asüba nisung tenüngtem sangdongogo. PL ya alima nung football league tem rongnung nungtugutiba ka lir.

Premier League-i, Hall of Fame ya parnoki agütsüba tetushi rongnung tematiba ta züngshir.

Hall of Fame ajanga, takok tajung anguba nisungtem shirnoki 1992 küm Premier League amenokba mapang nungi tenzüka tang tashi teyari tulu agüja arudar parnok tushir.

2021 küm Hall of Fame amenokba sülen tang tashi nung nisung 21 züngoksemogo aser parnok tenüng ya PL football

puti otsü nung teti atema ajenoka yuogo.

Taküm iba tetushi agütsütsü atema nisung 15 shimdanga lir.

2024 küm atema nominee temji:

Ashley Cole, Sol Campbell, Michael Carrick, Andrew Cole, Jermaine Defoe, Cesc Fabregas, Les Ferdinand, Robbie Fowler, Eden Hazard, Gary Neville, Michael Owen, David Silva, John Terry, Yaya Toure, Edwin Van Der Sar aser Nemanja Vidic.

2022 küm Wayne Rooney aser Patrick Vieira na automatically induct asü aser iba sülen vote agitepba sülen Sergio Aguero, Didier Drogba, Vincent Kompany, Peter

Schmeichel, Paul Scholes aser Ian Wright nungger züngoksema liasü.

Taoba küm Sir Alex Ferguson aser Arsene Wenger na ya Hall of Fame nung induct asüba mezungbuba manager aküm aser vote agitepba sülen Rio Ferdinand, Petr Cech aser Tony Adams nunggera züngoksema liasü.

Fan temi premier league.com/halloffame aser Premier League app ajanga vote agütsütettsü.

2024 atema online vote ya April 8 nü 12:00 BST tashi lapoka toktsütsü aser vote agütsür shimba nisung ana tenüng April 22 nü sangdongtsü.



Govt. Medical School Tuli 'C' nung Metsüremi (March) 26 & 27 anogo ananü saisapong sentong agiba mapang tanurtem asaya tapu balala nung shilem agiba noksa nung angur. Iba saisapong sentong nung akhi tsürabur mapang asayaba asaya Mokok gari, Süng jajatsü, Arr atsütepba, Mezüng tsüktepba, Antipong mechitepba aser süzüng sayiba nungertem asayadakja liasü. Iba yagi tanurtem nem akhi tsürabur tensa mapang indang bilemdangdaksür aser item asayatemji wazüka yudaktsütsü ajungshir. (Tuli, March 27, 2024).

Miami Open: Alcaraz, Medvedev, Sinner quarter-i iogo

Metsüremi/March 27, 2023 (Agencies): Miami Open tebur kija asaya tesüsabuba koker alisang Daniil Medvedev aser top seed asayar Carlos Alcaraz nati Mongolbarnü pei tata asaya koka Miami Open tebur kija asaya quarter-finals-i iogo.

Mongolbarnü Medvedev-i Germany nungger asayar Dominik Koepfer 7-6 (7/5), 6-0 agi akok aser Alcaraz-i Italy nungger asayar Lorenzo Musetti 6-3, 6-3 agi minute 85 nung koka liasü.

Kasa mapang nung Italy nungger asayar Jannik Sinner-ia, Australia nungger asayar Christopher O'Connell 6-4, 6-3 agi koka quarter-final-i iogo.

Alcaraz, shibai Indian Wells akokba sülen tang Miami Open koka 'Sunshine Double' akoktsü merangdar pa quarters nung Bulgaria nungger asayar Grigor Dimitrov den asayatsü, shibai Pole Hubert Hurkacz set asem tashi kanga toktepba asayaba

sülen 3-6, 6-3, 7-6 (7/3) agi kokogo.

Kasa mapang nung Medvedev-i asaya junga metenzüktet aser unforced errors aika menaba sülen mezungbuba set tie-break nung pa 0-4 agi tesülen liasü. Ajisüaka meyiper pai tajungba asayateta mezungbuba set akok. Iba sülen tanabuba set nungbo pai Koepfer nem asaya ka danga mekokdaksüi takok ngua liasü.

World number four asayar Medvedev ya quarter nung Chile nungger asayar Nicolas Jarry den asayatsü, shibai Norway nungger asayar Ruud 7-6 (7/3), 6-3 agi kokogo.

Chile nungger pusemer aikati pusema asayaba asaya ka nung Jarry-i winners 39 ngua liasü.

Kasa mapang nung Sinner-a quarters nung Czech nungger asayar Tomas Machac den asayatsü shibai Italy nungger asayar Matteo Arnaldi 6-3, 6-3 agi kokogo.

BILEMDANGANG
 "Tamakoktsüji memerangdangertem atema dang lir."